

# Ina nova pagina d'internet per la diaspora rumantscha

■ (cp) **L'Uniun da las Rumantschas e dals Rumantschs en la Bassa (URB) ha ina nova preschientscha en la rait ([www.uniun-urb.ch](http://www.uniun-urb.ch)). A partir dad ussa pon ils commembers ed auters interessents s'infurmar svelt ed a moda simpla davart eveniments ed activitads da l'uniun sin la pagina d'internet [www.uniun-urb.ch](http://www.uniun-urb.ch) – l'adressa resta la medema sco enfin qua.** Plinavant èn er il logo da l'URB cun la clav e la color turchis restads tuttina. La

tonalitat è però vegnida adattada: la slideshow cun impressiuns dal Grischun procura per variaziun ed ultra da quai vegnan publicgadas cuntinuadamain fotografias d'occurrènzas da l'URB.

En pli po il visitader uss era s'infurmar davart puncts impurtants da l'uniun: Tge intent ha l'uniun? Tgi presidiescha l'uniun? Co pon ins contactar la suprastanza? Cura e co è l'uniun vegnida fundada?

Da nov pon ins uss era leger a moda digitala il zunt stimà Fegliet ed il vocabulari inclus ed als telechargiar sco PDF.

La pagina d'internet cumpiglia ultra da quai era links ad uniuns ed organizaziuns da la Svizra rumantscha sco er al Pledari Grond da la Lia Rumantscha.

In'otra funcziun impurtanta per l'uniun sa chatta tar la rubrica «Contact» nua ch'ils commembers pon communitgar al secretariat da l'uniun eventualas midadas d'adressa (adressa postala ed

adressa dad e-mail). Uschia vul l'URB evitar en l'avegnir ch'i vegnian vinavant speditas dunsainas da Fegliets che na pon betg vegnir consegnads.

In grond engraziament admetta l'URB a la fatschenta Sidlerdesign a Zug per la realisaziun da la pagina d'internet ed a la Lia Rumantscha per il sustegn finanziel.

## Infurmaziuns davart l'URB

L'URB è in'associaziun affiliada da la Lia Rumantscha ch'è vegnida fundada il

1991. L'uniun vul intensivar il contact tranter las personas rumantschas en la diaspora sco er iniziar e sustegnair projects per meglierar la situaziun dal rumantsch en la diaspora. La suprastanza actuala sa cumpona da set personas e vegn presidiada dapi l'onn 2007 da *Jon Carl Tall*. L'uniun dumbra var 800 commembers. Sco numerusas autras uniuns en Svizra è era l'URB confruntada cun ina media da vegliadetgna relativamain auta (57 onns).